

OR DAL DICZIUNARI RUMANTSCH GRISCHUN

Igl um selvadi en la Cadi



Fresco digl um selvadi vid ina casa a Sacco, Valtina (15. tschentaner)

Foto DRG

En in uaul dalla Cadi habitava igl um selvadi cun sia dunna. Da temps en temps mav' el ora en ils vitgs dentuorn ed engulava e sblundergiava tgei ch'el pudeva tier. Da quei era la gliעד adina plein tema e saveva buca tgei far per vegnir libra da quei glimari.

In di vegn in um jester en la Cadi ed ei vegn raquintau ad el digl um selvadi. Quei jester era in um plein curascha e seporscha da liberar els da quei inimitg, sch'els dettien ad el ina gronda summa daners. Tut ei stau da quei beincuntents e leds. L'auter di semetta igl jester sin via per encurir si igl um selvadi. Suentier ditg encurir vegn el tier la hetta digl um selvadi e va en quella. Igl um selvadi damonda el beindabot, nua el mundi. «Jeu mun ad encurir lavur», rispunda igl jester. «Bein! Sche sas ti star cun mei!» di igl um selvadi. Igl jester ei cuntents ed els van pli tard in tochet

digl uaul en e prendan a mauns da fender lenna. In'uriala lavuran els omisdus bravamein. Allora ha igl jester saviu s'enschignar ch'igl um selvadi ei vegnius cun omisdus mauns denter la buora en ch'el pudeva buca ora.

Igl um selvadi ha detg agl jester: «Va e fai dar mia dunna ils cugns ch'jeu possi ora culs mauns!» Igl jester va, mo enstagl dils cugns damond' el dalla dunna ils daners ch'ella hagi en casa. La dunna surstat, va ora avon la hetta e grescha vi a siu um, sch'ella duei dar tuts. Quel rispunda dabot: «Gie, gie, dai tuts!» El maniava ils cugns. La dunna vegn en, dat neu tut ils daners. Igl jester pren els beinspert e fa la fuigia.

Suentier in'uriala vegn igl jester tier in pastur, che pertgirava nuorsas, e cumpra giu in tschut da quel. El pren, mazza quei tschut e metta il

saung en ina scufla da curom, catscha quella en sil pèz ed entscheiva a cuorer. In mument suenter catsch' el il cunti en la scufla, ch'il saung vegnev' ora, ed entscheiva a cuorer aunc pli dabot. En in pign mument er' el stulius ord ils egls.

Igl um selvadi ha spetgau ina gronda uriala, mo vegnend negin neunavon, entscheiva el a clamar la dunna per agid. La dunna ha udiu il burlir digl um ed ei ida per mirar tgei ei seigi. Igl um damonda: «Vegniss buca aunc cun ils cugns?» Ed ella raquenta allora, co igl jester hagi fatg cun ella. Cura ch'igl um selvadi ha udiu quei, eis el vegnius bunamein ordasenn. La dunna ei currida per ils cugns ed ha deliberau igl um.

Sco ch'igl um selvadi ei staus libers, eis el currius suenter agl jester, ed ei vegnius tier il pastur. Quel ha el dumandau, sch'el hagi buca viu in um che seigi fugius. «Bein!» di il pastur, «in tal um ei staus cheu, ha cumprau in tschut ed ei currius vinavon. Cura ch'el ei staus in toc, ha el catschau il cunti el pèz ch'ei ei vegniu ora saung. Allora ha el pudiu cuorer aunc bia pli dabot».

Igl um selvadi tratga tier sesez: «Sche quei ei aschia, sche quei sai jeu era far, sche pos jeu era ir pli dabot». El catscha siu cunti el pèz. Mo strusch ha el giu fatg treis pass, sch'eis el daus per tiara vi e ventschius.

Igl jester va giu el vitg e fa da saver la fin digl um selvadi. Tut era miez ordasenn dil legherment, ed ei han lura pagau ora agl jester ina gronda summa daners.